



楊炯集卷上

賦

渾天賦并序



顯慶五年炯時年十一待制弘文館上元二  
年始以應制舉補校書郎朝夕震臺之下備  
見銅渾之象尋返初服卧疾丘園二十年而  
徙宮斯亦拙之效也代之言天體者未知渾  
蓋孰是代之言天命者以為禍福由人故作  
渾天賦以辯之其辭云

有爲宣夜之學者喟然而言曰旁望萬里之橫山而皆青翠俯察千仞之深谷而皆黝黑蒼蒼在上非其正色遠而望之無所至極日月載於元氣所以或中而或具星辰浮於太空所以有行而有息故知天常安而不動地極深而不測可以爲觀象之準繩可以作談天之楷式有稱周髀之術者輒然而笑曰陽動而陰靜天迴而地游天如倚蓋地若浮舟出於卯入於酉而生晝夜交於蔭合於角而

有春秋天則西北旣傾而三光北轉地則東南不足而萬穴東流比於圓首前臨曾者後不能覆背方於執炬南稱明者北可以言幽此天與而不取惡煌煌而更求太史公有睟其容乃盱衡而告曰楚旣失之齊亦未爲得也言宣夜者星辰不可以闕狹有常言蓋天者漏刻不可以春秋各半周三徑一遠近乘於辰極東井南箕曲直殊於河漢明入於地葛稚川所以有辭候應於天桓君山由其發

難假蘇秦之不死既莫知其說儻隸首之重生亦不能成其筭也二客嘗聞渾天之事與請爲左右揚擢而陳之原夫杳杳冥冥天地之精混混沌沌陰陽之本何太虛之無礙偉造化之多端南溟玉室之宮爰皇是宅西極金臺之鎮上帝攸居地則方如碁局天則圓如彈丸天之運也一北而物生一南而物死地之平也影長而多暑影短而多寒太陰當日之衝也成其薄蝕衆星傳月之光也因其

波瀾乾坤闔闢天地成矣動靜有常陰陽行矣方以類聚物以群分吉凶生矣在天成象在地成形變化見矣剖之以三門張之以八紀其周天也三百六十五度其去地也九萬一千餘里日居月諸天行而地止載之以氣乘之以水生之育之長之畜之亭之毒之蓋之覆之天聰明也聖人得之天垂象也聖人則之其道也不言而信其神也不怒而威驗之以衡軸考之以樞機三十五官爲群生之

繫命一十二次當下土之封畿中衡外衡每  
不召而自至黃道赤道亦殊途而同歸表裏  
見伏聖人於是乎發揮分至啓閉聖人於是  
乎範圍可以窮理而盡性可以極深而研幾  
天有北斗杓携龍角魁枕參首天有北辰衆  
星環拱大帝威神尊之以耀魄配之以勾陳  
有四輔之上相有二公之近臣華蓋巖巖俯  
臨於帝座離宮奕奕旁絕於天津列長垣之  
百堵啓閭闔之重闈文昌拜於大將大理囚

於貴人泰階平而君臣穆招搖指而天下春  
東宮則析木之津壽星之野箕爲傲客房爲  
駟馬天王對於攝提皇極臨於宦者左角右  
角兩耀之所巡行陰間陽間五星之所取舍  
後宮掌於燕息太子承於冢社宗人宗正內  
外敦叙於邦家市樓市垣貨殖畢陳於天下  
北宮則靈龜潛匿騰蛇伏藏瓜瓞宛然而獨  
處織女終朝而七襄登漸臺而顧步御輦道  
而徜徉聞雷霆之隱隱聽抱鼓之礧礧南斗

主爵祿東壁主文章須女主布幣牽牛主關  
梁羽林之軍所以除暴亂壘壁之陣所以備  
非常西宮則天潢咸池五車三柱奎為封豕  
參為白虎胃為天倉婁為衆聚旄頭之北宰  
制其胡虜天畢之陰蓄洩其雷雨火陵積尸  
之肅殺參旗九旄之部伍樵蘇之地出於園  
苑萬億之貲填積於倉庾南宮則黃龍賦象  
朱鳥成形五帝之座三光之庭傷成於鉞誅  
成於鑕禍成於井德成於衡執法者廷尉之  
列大夫之象少微者儲君之位處士之星天  
弧直而狼顧軍市曉而鷄鳴三川之交鶉火  
通其耀七澤之國翼軫寓其精南河北河象  
闕於是乎增峻左轄右轄邊荒於是乎自寧  
乃有金之散氣水之精液法渭水之橫橋像  
昆池之刻石歲時占其水旱滄溟應其潮汐  
織女之室漢家之使可尋飲牛之津海上之  
人易覲日也者衆陽之長人君之尊天雞曉  
唱靈烏晝跋扶桑臨於大海若木照於崑崙

太平太蒙所以司其出入南至北至所以節其寒溫龍山銜燭不能議其光景夸父棄策無以方其駿奔月也者群陰之紀上天之使異姓之王后妃之事方諸對而明水澆重暈布而邊風駛纒盈蚌蛤則虜騎先侵適闢麒麟則暗虎潛值五星者木爲重華火爲熒惑鎮居戊巳斯爲土德太白主西辰星主北俯察人事仰觀天則比參右肩之黃如奎大星之黑五材所以致用七政於焉不忒同舍而有四方分天而利中國赤角犯我城黃角天之爭五星同色天下偃兵趨前舍爲盈退後舍爲縮盈則侯王不寧縮則軍旅不復或向而或背或遲而或速金火犯之而甚憂歲鎮居之而有福觀衆星之部署歷七耀之驅馳定天下之文所以通其變見天下之曠所以象其宜然後播之以風雨威之以霜霰或吐霧而蒸雲或擊雷而奔電一旬而太平感膚寸而天下徧白日爲之晝昏恒星爲之不見

爾乃重明合璧五緯連珠青氣夜朗黃雲旦  
扶握天鏡受河圖若曰賜之以福此明王聖  
帝之休符至如恠雲祆氛冬雷夏雪日暈長  
虹星流伏鱉陰有餘而地動陽不足而天裂  
若曰懼之以災此昏主亂君之妖孽昔者顓  
頊之命重黎司天而司地陶唐之分仲叔宅  
西而宅東其後宋有子韋鄭有禪竈魏有石  
氏齊有甘公唐都之推星王朔之候氣周文  
之觀日吳範之占風有以見天地之情狀識

陰陽之變通詩曰謂天蓋高語曰惟天爲大  
至高而無上至大而無外四時行焉萬物生  
焉群神莫尊於上帝法象莫大於皇天靈心  
不測神理難筮日何爲兮右轉天何爲兮左  
旋盤古何神兮立天地巨靈何聖兮造山川  
螟何細兮師曠清耳而不聞離婁拭目而無  
見鵬何壯兮搏扶搖而翔九萬運海水而擊  
三千龜與蛇兮異其短長之質椿與菌兮殊  
其大小之年鐘何鳴兮應霜氣劔何伏兮動



星躔列子何方兮御風而有待師門何術兮  
驗火而登仙魯陽揮戈兮轉於西日陶侃折  
翼兮登乎上玄女何怨兮化精衛帝何耻兮  
為杜鵑爭疆理者有零陵之石聞絃歌者有  
蓋山之泉若恠神之不語夫何述於此篇以  
太乙之武也焦土而爛石以唐堯之德也襄  
陵而懷山以顏回之賢也貧居於陋巷以孔  
丘之聖也情希乎執鞭馮唐入於郎署也兩  
君而未識揚雄在於天祿也三代而不遷桓  
譚思周於圖讖忽焉不樂張衡術窮於天地  
也退而歸田我無為而人自化吾不知其所  
以然而然

浮漚賦

在霖霖之可翫恠浮漚而已矣况曲澗兮增  
波復坳塘兮漲水霽滴瀝兮行注砌潺湲而  
浪起寸步百川咫尺千里於是乍明乍滅時  
行時止徘徊雨足而分規擘波心而對峙輕盈  
徘徊容與庭槐壯若初蓮出浦映清波而未

開又似繁星落曙映斜漢而將迴合散消息  
安有常則倏來忽往不可為象雨密稠生風  
牽亂上若乃空濛來褰浩汗浮天流平舊沼  
溢滿新泉分容對出吐映均鮮觸流萍而欲  
散礙浮芥而還連光凌虛而半動影倒水而  
分圓始參差而別趣終宛轉以同滄歷亂如  
珠漂沸縈紆細而察之若美人臨鏡開寶靨  
大而望也若馮夷剖蚌列明珠逐風波而淡  
蕩乃變化而湏臾跡均顯晦妙合虛無同至  
人之體道亦隨時而不拘夫其得坻則止乘  
流則返處上下而無窮任推移而不係似君  
子之從容常卷舒而不滯故其在陽則隱在  
陰則出泄泄溶溶匪徐匪疾因自然以見體  
託行潦以凝質類達人之脩身故不欺於暗  
室蕩薄畎澮鼓舞洲渚其生兮若浮其居兮  
若旅雲銷而霽寂無處所惟斯物之靡依獨  
含情而應機暫假有而示潔終淪空而匿輝  
苟無心以自累夫何適而有違

卧讀書架賦

儒有傳經在乎致遠力學在乎請益士安統  
於書淫元凱稱於傳癖高眠孰可詎貽邊子  
之嘲甘寢則那寧恥宰予之責伊國工嘗巧  
度山林擬以為格既有奉於詩書故無違於  
枕席朴斷初成因夫美名兩足山立雙釣月  
牛從繩運斤義且得於方正量柄製鑿術乃  
取於縱橫功因期於學術業可究於經明不  
勞於手無費於目閱卷則氣雜香芸掛編則  
色連翠竹風清夜淺每待遽遽之覺日永春  
深常偶便便之腹股因茲而罷刺膺由是而  
無伏庶恩覃於下幃豈遽留而更讀其利何  
如其樂只且巾遂掛於簾幌履誰曳於階除  
每偶草玄之字不親非聖之書比角枕而嗟  
若匹瑤琴而病諸爾其臨窓有風閉戶多雪  
自得陶潛之興仍秉素安之節既幽獨而多  
閑遂憑茲而徧閱讀易則期於隱索習禮則  
防於志悅倘叔夜之神交固周公之夢絕其

始也一木所爲其用也萬卷可披墨沼之前  
謂江帆之乍至書林之下若雲翼之新垂動  
靜隨於語默出處任於輓推必欲事於所事  
實斯焉而取斯因謂之曰爾有卷兮爾有舒  
爲道可以集虛爾有方兮爾有直爲行可以  
立德濟筆海兮爾爲舟航騁文囿兮爾爲羽  
翼故吾不知夫不可聊逍遙以宴息

孟蘭盆賦

粵大周如意元年秋七月聖神皇帝御洛城

南門會十方賢衆蓋天子之孝也渾元告秋  
羲和奏曉太陰望兮圓魄皎閭闔開兮涼風  
嫋四海澄兮百川晶陰陽肅兮天地官掃離  
宮清重閣設黃邸張翠幕鸞飛鳳翔揚倏爍  
雲舒霞布翕赫霍陳法供飾孟蘭壯神功之  
妙物何造化之多端青蓮吐而非夏頰果搖  
而不寒銅鐵銀錫瓊琳琅玕映以甘泉之玉  
樹冠以承露之金盤憲章三極儀形萬類上  
寥廓兮法天下安貞兮像地殫恠力窮神異

少君王子製曳曳兮若來玉友瑤姬翩躑躑  
兮必至鳴鵲鷓與鸞鷲舞鷓鷄與翡翠毒龍  
拏兮赫然狂象奔兮沉醉怖魍魎潛魑魅離  
婁明日不足見其精微匠石洗心不足徵其  
奧祕續續紛紛氛氤氲五色成文若榮光  
休氣發彩於重雲奮奮燦燦煥煥爛爛三光  
壯觀若合璧連珠耿耀於長漢夫其遠也天  
台桀起統之以赤霞夫其近也削成孤峙覆  
之以蓮花晃兮瑤臺之帝室施兮金闕之仙  
家其高也上諸天於大梵其廣也遍諸法於  
恒沙上可以蘆元符於七廟下可以納群動  
於三車者也於是乎騰聲名列部伍前朱雀  
後玄武左蒼龍右白虎環衛匝羽林周雷鼓  
八面龍旂九斝星戈耀日霜戟含秋三公以  
位百寮乃入鳴珮鏘鏘高冠岌岌規矩中威  
容翕無族談無錯立若乃山中禪定樹下經  
行菩薩之權現如來之化生莫不汪洋在列  
歡喜充庭天人嚴而同會龍象寂而無聲聖

神皇帝乃冠通天佩玉璽冕旒垂目沈纒塞  
巨前後正臣左右直史身爲法度聲爲宮徵  
穆穆然南面以觀矣八枝初會四影高懸上  
妙之座取於燈王之國大悲之飯出於香積  
之天隨藍寶味舍衛金錢麴爲山弓酪爲沼  
花作雨弓香作煙明因不測大福無邊鏗九  
韶撞六律歌千人舞八佾孤竹之管雲和之  
瑟麒麟在郊鳳凰蔽日天神下降地祇咸出  
於是乎上公列卿夫長學士再拜稽首而言  
曰聖人之德無以加於孝乎散元氣運洪爐  
斷鰲足受龍圖定天寶建皇都至如立宗廟  
平圭奧繡栴文楣山淦藻椀昭穆叙樽鼎設  
以觀嚴祖之耿光以揚先皇之大烈孝之始  
也考辰耀帝明堂廣四修一上圓下方布時  
令合蒸嘗配天而祀文考配地而祀高皇孝  
之中也真大乘昭群聖先祖考登靈慶發深  
心展誠敬形於四海加於百姓孝之終也夫  
孝始於顯親中於禮神終於法輪武盡美矣

周命惟新聖人皇帝於是乎唯寂唯靜無營  
無欲壽命如天德音如玉任賢相悖風俗遠  
佞人措刑獄省遊宴披圖錄捐珠璣寶菽粟  
罷官文無事恤人文不足鼓天地之化淳作  
皇王之軌躅太陽夕乘輿歸入紫微宿

幽蘭賦

惟幽蘭之芳草稟天地之純精抱青紫之奇  
色挺龍虎之嘉名不起林而獨秀必固本而  
叢生爾乃丰茸十步綿連九畹莖受露而將  
低香從風而自遠當此之時叢蘭正滋美庭  
闈之孝子循南陔而采之楚襄王蘭臺之宮  
零落無叢漢武帝猗蘭之殿荒涼幾變聞昔  
日之芳菲恨今人之不見至若桃李水佩  
蘭若而續魂竹箭山陰坐蘭亭而開宴江南  
則蘭澤爲洲東海則蘭陵爲縣隰有蘭兮蘭  
有枝惻遠別兮交新知氣如蘭兮長不改心  
若蘭兮終不移及夫東山月出西軒日晚授  
燕女於春閨降陳王於秋坂乃有送客金谷

林塘坐曛鶴琴未罷龍劔將分蘭缸燭耀蘭  
麝氛氲舞袖迴雪歌聲過雲度清夜之未艾  
酌蘭英以奉君若夫靈均放逐離群散侶亂  
鄢郢之南都下瀟湘之北渚步遲遲而適越  
心鬱鬱而懷楚徒春戀於君王歛精神於帝  
女江洲兮極目芳菲兮襲汝思公子兮不言  
結芳蘭兮延佇借如君章有德通神感靈縣  
車舊館請老山庭白露下而警鶴秋風高而  
亂螢循堦除而下望見秋蘭之青青重曰若  
有人兮山之阿紉秋蘭兮歲月多思握之兮  
猶未得空佩之兮欲如何乃抽琴操爲幽蘭  
之歌歌曰幽蘭之生兮於彼朝陽含雨露之  
津潤吸日月之休光美人愁思兮採芙蓉於  
南浦公子忘憂兮樹萱草於北堂雖處幽林  
與窮谷不以無人而不芳趙元叔聞而嘆曰  
昔聞蘭葉據龍圖復道蘭林引鳳雛鴻歸燕  
去紫莖歇露往霜來綠葉枯悲秋風之一敗  
與萬草而爲芻



青苔賦

粵若稽古聖皇重耀日光開博望之苑闢思  
賢之堂華館三襲琬軒四下地則經省而書  
坊人則後車而先馬相彼草木兮或有足言  
者吁嗟青苔兮今可得而聞也借如靈山偃  
蹇巨壁崔嵬畫千峰而錦照圖萬壑而霞開  
王孫遊兮山之隈披薜荔兮踐莓苔悵容與  
兮徘徊一去千年兮時不復來至若圓潭寫  
鏡方流聚玉苔何水而不清水何苔而不綠  
漁父遊兮漢川曲歌滄浪兮濯吾足桂舟橫  
兮蘭柁觸浦淑逴迴兮心斷續別有崇臺廣  
厦粉壁椒塗梁木蘭兮椽玳瑁草離合兮樹  
珊瑚白露下蒼苔蕪暗瑤砌澁瓊鋪有美人  
兮向隅應閉門兮踟躕心震蕩兮意不愉顏  
如玉兮淚如珠請循其本也見商羊兮鼓舞  
召風伯兮電赴占顧兔兮離畢星雷闐闐兮  
雨冥冥皓皓兮蕩蕩見潢汚之滿庭倏兮忽  
兮視苔蘚之青青爾其爲狀也幕歷綿密浸

澤布護斑駁兮長廊黃綠兮古樹肅兮若遠  
山之松栢汎兮若平郊之煙霧春淡蕩兮景  
物華承芳卉兮藉落花歲崢嶸兮日云暮迫  
寒霜兮犯危露觸類而長其生也蕃莫不文  
堦兮鏤瓦碧地兮青垣別生分類西京南越  
則烏韭兮綠錢金苔兮石髮苔之爲物也賤  
苔之爲德也深夫其爲讓也每違燥而居濕  
其爲謙也常背陽而即陰重扃祕宇兮不以  
爲顯幽山窮水兮不以爲沉有達人卷舒之  
意君子行藏之心唯天地之大德匪予情之  
所任

庭菊賦并序

庭菊美貞芳也天子幸於東都皇儲監守於  
武德之殿以門下內省爲左春坊今庶子裴  
公所居即黃門侍郎之廳事也其庭有菊焉  
中令薛公昔拜瑣闥此焉遊處今兼左庶子  
止於東廳薨宇連接洞門相向每罷朝之後  
未嘗不遊於斯詠於斯覽叢菊於斯歎其君

子之德命學士爲之賦是日也薛觀以親賢  
爲洗馬田若以幽貞爲學士高元思張師德  
以至孝託後車顏強學沈尊行以博聞兼侍  
讀周宗李憲王祖英曹叔文以儒術進崔融  
徐彥伯劉知三石抱忠以文章顯德行則許  
子豐耆舊則權無二駱綰則詁訓之前識張  
相則老莊之後興並承高命咸窮體物小子  
託於吹竽之末敢闕其詞哉遂作賦云  
日之貞矣于彼重陽菊之榮矣于彼華芳含

天地之貞氣吸日月之淳光雲布霧合箕舒  
翼張鬱兮蔓衍郁兮芬芳珉枝金萼翠葉紅  
芒其在夕也言庭燎之晷晷其向晨也謂明  
星之煌煌爾其萬里年華九州春色花的皪  
兮如錦草絲連兮似織當此時也和其光同  
其塵應春光而早植及夫秋星下照金氣上  
騰風蕭蕭兮瑟瑟霜刺刺兮稜稜當此時也  
弱其志強其骨獨歲寒而晚登雨還風去天  
長地久純黃象於后土故採尋而菊衣輕體

御於神仙故登山而菊酒文賓採之而羽化  
康公服之而不朽東極於是長生南極以之  
眉壽胡太尉之允誠光輔漢庭萬機理三階  
平及暮年華髮垂肩秋菊落英蠲邪滌廢於  
焉永貞鍾太尉之聲家彝倫魏室道合鹽梅  
功成輔弼降文星之命修彭祖之術保性和  
神此焉終吉君章請老歲久懸車秋風生兮  
北園夕白露濕兮前堦虛佇閑庭之曠望對  
涼菊之扶踈人生行樂孰知其餘淵明解印


退歸田野山鬱律兮萬里天蒼莽兮四下憑  
南軒以長嘯出東籬而盈把歸去來兮何爲  
者若此窈窕重闈亘青瑣兮接黃扉深沉大  
壯通肅成兮連博望乃有邕鄉貴族薛縣名  
家共汾河之鼎氣同庶子之春華朝遊夕處  
徘徊顧慕歎搖落於三秋偉貞芳於十步伊  
纖莖之菲薄荷君子之恩遇不羨池水之芙  
蓉願比瑤山之桂樹歲如何其歲已秋叢菊  
芳兮庭之幽君子至此悵容與而滿罍歲如

何其歲將逝  
叢菊芳兮庭之際  
君子至止聊  
從容以卒歲

楊炯集卷上

楊炯集卷下

五言古詩

 廣溪峽

廣溪三峽首  
曠望兼川陸  
山路遶羊腸  
江城鎮魚腹  
喬林百丈偃  
飛水千尋瀑  
驚浪迴高天  
盤渦轉深谷  
漢氏昔云季  
中原爭逐鹿  
天下有英雄  
襄陽有龍伏  
常山集軍旅  
永安興板築  
池臺忽已傾  
邦家遽淪覆  
庸才若劉禪  
忠佐爲心腹  
設險猶可存  
當無賈生哭

巫峽

三峽七百里唯言巫峽長重巖窅不極疊嶂  
凌蒼蒼絕壁橫天險莓苔爛錦章夜分明  
見  
忠信吾所蹈泛舟亦何傷可  
以涉砥柱可以浮呂梁美人今何在靈芝徒  
有芳山空夜猿嘯征客淚沾裳

西陵峽

絕壁聳萬仞長波射千里盤薄荆之門滔滔  
南國紀楚都昔全盛高丘烜望祀秦兵一旦  
侵夷陵火潛起四維不復設關塞良難恃洞  
庭且忽然孟門終已矣自古天地闢流為峽  
中水行旅相贈言風濤無極已及余踐斯地  
瓌竒信為美江山若有靈千載伸知己

奉和上元酺宴應詔

甲乙遇災年周隨送上絃祆星六丈出沴氣  
七重懸赤縣空無主蒼生欲問天龜龍開寶  
命雲火昭靈慶萬物覩真人千秋逢聖政祖  
宗玄澤遠文武休光盛大號域中平皇威天

下驚參辰昭文物宇宙泱聲明澤后三章令  
周王五代兵凶奴窮地角本自遠正朔驕子  
起天街由來虧禮樂一衣掃風雨再戰夷屯  
剥清明日月旦蕭索煙雲渙寒暑旣平分陰  
陽復貞觀惟神諧妙物乃聖符幽贊下武發  
禎祥平階屬會昌金泥封日觀碧水匝明堂  
業盛勛華德興包天地皇孝思義罔極易禮  
光前式天渙三辰輝靈書五雲色敬時窮發  
歛卜代盈千億五緯聚華軒重光入望國公

卿論至道天子拜昌言雷解初開出星空即  
便元瑤臺涼景薦銀闕秋陰遍百戲騁魚龍  
千門壯宮殿深仁洽蠻衡愷樂周寰縣宣室  
召群臣明庭禮百神仰德還符日霑思更似  
春襄城非牧監楚國有巴人

五言律詩

從軍行

烽火照西京心中自不平牙璋辭鳳闕鐵騎  
遶龍城雪暗凋旗畫風多雜鼓聲寧爲百夫

長勝作一書生

唐劉生

卿家本六郡年長入三秦  
白壁酌知己黃金  
謝主人劔鋒生赤電  
馬足起紅塵日暮歌鍾  
發喧喧動四隣

送臨津房少府

岐路三秋別江津  
萬里長煙霞駐征蓋  
絃奏促飛觴階樹含斜日  
池風泛早涼贈言未終  
竟流涕忽霑裳

送豐城王少府

愁結亂如麻長天照落霞  
離亭隱喬樹溝水浸平沙  
左尉才何屈東關望漸賒  
行看轉牛斗持此報張華

送鄭州周司空

漢國臨清渭京城枕蜀河  
居人下珠淚賓御促驪歌  
望極關山遠秋深煙霧多  
唯餘三五夕明月暫經過

駘馬



駉馬鐵連錢長安俠少年帝畿平若水官路  
直如絃夜玉粧車軸秋金鑄馬鞭風霜但自  
保窮達任皇天

### 出塞

塞外欲紛紜雌雄猶未分明堂占氣色華蓋  
辨星文二月河魁將三千太一軍丈夫皆有  
志會是立功勲

### 有所思

賤妾留南楚征夫向北燕三秋方一日少別  
比千年不掩嘔紅縷無論數綠錢相思明月  
夜迢迢白雲天

### 梅花落

窓外一株梅寒花五出開影隨朝日遠香逐  
便風來泣對銅鈎障愁看玉鏡臺行人斷消  
息春恨幾徘徊

### 折楊柳

邊地迷無極征人去不還秋容凋翠羽別淚  
損紅顏望斷流星驛心馳明月關藁砧何處

在揚柳自堪攀

紫駟馬

俠客重周游金鞭控紫駟蛇弓白羽箭鶴轡  
赤茸鞦發跡來南海長鳴向北州匈奴今未  
滅畫地取封侯

戰城南

塞北途遼遠城南戰苦辛幢旗如鳥翼甲冑  
似魚鱗凍水寒傷馬悲風愁殺人寸心明白  
日千里暗黃塵

送梓州周司功

御溝一相送征馬屢盤桓言笑方無日離憂  
獨未寬舉杯聊勸酒破涕暫為歡別後風清  
夜思君蜀路難

送揚處士反初卜居曲江

鴈門歸去遠垂老脫袈裟蕭寺休為相曹溪  
便寄家綠琪千歲樹黃糴四時花別怨應無  
限門前桂水斜

五言排律

送劉校書從軍

天將下三宮星門台五戎坐謀資廟略飛檄  
佇文雄赤土流皇劔烏號明月弓秋陰生蜀  
道殺氣繞湟中風雨何年別琴尊此日同離  
亭不可望溝水自西東

遊廢觀

青嶂倚丹田荒原數百年猶知小山桂尚識  
大羅天藥敗金爐火苔昏玉女泉歲時無壁  
畫朝夕有階煙花柳三春節江山四望懸悠  
然出塵網從此狎神仙

和石待御山莊

煙霞非俗累巖壑只幽居水浸何曾畎荒郊  
不復鋤影濃山樹密香淺澤花踈闕塹防斜  
徑平堤夾小渠蓮房若箇實竹節幾竿虛蕭  
然隔城市酌醴夢枯魚

和崔司空傷姬

昔時南浦別鶴怨寶琴絃今日東方至鸞銷  
珠鏡前水流銜砌咽月影向窓懸粉匣悽餘

淚薰爐滅舊煙晚庭摧玉樹寒帳委金蓮佳  
人不再得雲日幾千年

和騫右丞省中暮望

故事閑臺閣仙門藹已深舊章窺複道雲幌  
肅重陰玄律葭灰變青陽斗柄臨年光搖樹  
色春氣繞蘭心風響高窓度流痕曲岸侵天  
明總樞轄人鏡辨衣簪日暮南宮靜瑤華振  
雅音

和劉侍郎入隆唐觀

福地陰陽合仙都日月開山川凌四險城樹  
隱三臺伏檻排雲出飛軒遶澗回參差陵倒  
影消灑軼浮埃百果珠爲實群峯錦作苔懸  
蘿暗疑霧瀑布響成雷方士燒丹液真人泛  
玉杯還如問桃水更似得蓬萊漢帝求仙日  
相如作賦才自然金石奏何必上天台

和輔先入昊天觀

遁甲爰皇里星占太一宮天門開奕奕佳氣  
鬱恣恣碧落三乾外黃圖四海中邑居環若

水城闕抵新豐玉檻崑崙側金樞地軸東上  
真朝北斗元始詠南風漢君祠五帝淮王禮  
八公道書藏竹簡靈液灌梧桐草茂瓊塔綠  
花繁寶樹紅石樓紛似畫地鏡森如空桑海  
年應積桃源路不窮黃軒若有問三月住崆

峒

和酬號州李司法

唇齒標形勝關河壯邑居寒山抵方伯秋水  
面鴻臚君子從遊宦忘情任卷舒風霜下刀

筆軒蓋擁門閭平野雲黃遍長洲鴻鴈初菊  
花宜泛酒蒲葉好裁書昔我芝蘭契悠然雲  
雨跡非君重千里誰肯惠雙魚

和旻上人傷果禪師

淨業初中日浮生大小年無人本無我非後  
亦非前簫鼓旁喧地龍蛇真應天法門摧棟  
宇覺海破舟船書鎮秦王餉經文宋國傳聲  
華周百億風烈破三千蕪沒青園寺荒涼紫  
陌田德音殊未遠拱木已生煙

和鄭讎校內省眺矚思鄉友

銅門初下辟石館始沉研遊霧千金字飛雲  
五色牋樓臺橫紫極城闕俯青田暄入瑤房  
裏春迴玉宇前霞文埋落日風物淡歸煙翰  
墨三餘隙關山四望懸頽峯睽酌羽流水曠  
鳴絃雖欣承白雪終恨隔青天

和劉長史答十九兄

帝堯平百姓高祖宅三秦子弟分河岳衣冠  
動縉紳盛名恒不隕歷代幾相因街巷塗山

曲門閭洛水濱五龍金作友一子玉為人寶  
劔豐城氣明珠魏國珍風標自落落文質且  
彬彬共許刁元亮同推周伯仁石城俯天闕  
鍾阜對江津驥足方遐騁狼心獨未馴鼓鼙  
鳴九域風火集重圍城勢餘三板兵威乏四  
隣居然混玉石直置保松筠耿介酬天子危  
言數賊臣鍾儀琴未奏蘇武節猶新受祿寧  
辭死揚名不顧身精誠動天地忠義感明神  
恠鳥俄垂翼蛇竟暴鱗來朝拜休命述職

下梁岷善政馳金馬嘉聲統玉輪三荆忽有  
贈四海更相親官徵諧鳴石光輝掩燭山  
川遙滿目零露坐沾巾友愛光天下恩波浹  
後塵懦夫仰高節下里繼陽春

送李庶子致仕還洛

此地傾城日由來供帳華亭逢李廣騎門接  
邵平瓜原野煙氛匝關河遊望賒白雲斷巖  
岫綠草覆江沙詔賜扶陽宅人榮御史車灞  
池一相送流涕向煙霞

早行

敞朗東方徹闌干北斗斜地氣俄成霧天雲  
漸作霞河流纔辨馬巖路不容車阡陌經三  
歲閭閻對五家露文沾細草風影轉高花日  
月從來惜關山猶自賒

途中

悠悠辭鼎邑去去拒金墉途路盈千里山川  
亘百重風行常有地雲出本多峯鬱鬱園中  
柳亭亭山上松客心殊不樂鄉淚獨無從

五言絕句

夜送趙縱

趙氏連城壁由來天下傳送君還舊府明月  
滿前川

附炯姪女臨鏡曉粧一首

林鳥驚眠罷房櫳曙色開鳳釵金作縷鸞鏡  
玉爲臺粧似臨池出入疑向月來自憐方未  
已欲去復徘徊

楊炯集卷下終





